

NOYÉ POR ONE LOÛDÈNE.

Li vint' cinq di décembre, à yût' eûres au matin,
Nosse solia d'meûre è s' lét, come à mitan dôrnis' ,
Parèy à m' vî soçon qu'a rarivé mwârt plin
Après one chîje trawéye qu'a toûrné à wachis' !
Nosse dame Loûdène s'en fout, c'èst l' dêrin d' sès tracas !
Èle profite dèl boune aîr sins s' plinde qu'èlle èst trop frisse.
Èle si plaît bin tote seûle, èt èle ni d'mande nin mia
Qui d' zoupler su lès broûs, lès crolaus, lès bouchenis'.
Avou tote si famille, i vègnenut d' dècider
Qu'i djokeront d' foute li camp po l' payis qu'on-z-î soûwe :
« Vorer aus sèt' cints diâles, èt tos l's-ans ! Po qwè fé ?
Sopwartans lès frèdeûs ! À l' longue, on s'abitoûwe ! »
En l' vèyant zouploter ossi gaîye qu'on pinson,
On dîreut qu' tot va bin, qu'on n' si fait pont d' maus d' tièsse ;
Portant, èle n'èst nin sote, èt èlle a byin raïson
Di spaurgnî totes sès fwaces putôt qui d' vlu fé l' fièsse.
Au Noyé, djon.ne ou vî, l'ome fait glèter s' minton.
Mins, po nosse bia mouchon, ça, c'è-st-one ôte istwêre !
I sèt bin qu'à l' djaléye, à l' nîve, tos lès sumeçons,
Faurè fé one crwès d'ssus pace qu'i-gn-aurè pus wêre.
Pôreut tot l' minme valu qui l' blanke sipène qu'èst là
Audereûve one pètche ou deûs rin qu' po passer l'idéye.
Adon, gn-a co l' mouchèt qui crève di fwim véla,
Qui n'è freut qu'one bouchîye ! Maugré qu'èlle èst fayéye,
Nosse loûdène tûze tofêr qui, s'èle si vout r'chandi,
Èle li pout payî tchèr ! Èt portant, èlle èst fiére
Di gonfler si stomac', on djane d'ou qui r'glatit :
C'èst s' drapia paurtadjî avou tos sès compères.
Dj'a si bin stî muwé tot r'waîtant ç' mouchon là
Qui dji n' m'a seû passer dè lî fé one bistoke :
Dj'a fait rabroker m' tchèt qui n' dimandeut nin mia,
Lî fé comprinde qu'au tchôd, i n' risqueut pont d'aroke.
On n' sèt jamaîs qu' l'idéye vos vèreut d' fé come mi !
Vos-aurîz tot vosse tîmps po razouyî l' loûdène.
On côp l' marou à yute, bin r'pachu èt nauji,
Come payemint, rin qu' por vos, èle lancerè s'-t-ârquèdène.

Albert Delvaux
Décembre 2012

Loûdène = rouge-gorge